

Kerajaan tetap berusaha bawa pulang rakyat Malaysia terkandas di luar negara – Hishammuddin

Astro Awani

22 Mac 2020

Afiezy Azaman,

KUALA LUMPUR: Kerajaan akan berusaha sedaya-upaya membawa pulang rakyat Malaysia yang masih terkandas di luar negara, kata Menteri Luar Datuk Seri Hishammuddin Hussein.

Katanya, walaupun ramai yang telah berjaya dibawa pulang, masih ada rakyat Malaysia yang terkandas di luar negara susulan pendirian kerajaan berkenaan dalam kes COVID-19.

“Biarpun saya tahu, ada segelintir yang tidak setuju untuk bawa mereka pulang kerana bimbang meningkatkan risiko COVID-19.

“Namun saya tetap ingin menegaskan saya tidak akan pernah berhenti berusaha untuk bawa rakyat Malaysia pulang. Negara ini milik mereka juga,” katanya dalam satu kenyataan hari ini.

Mengulas lanjut, Ahli Parlimen Sembrong itu berkata, adalah hak rakyat Malaysia untuk pulang ke tanah air pada bila-bila masa.

“Saya juga mahu mengingatkan mereka yang dibawa pulang ini, apabila tiba di Malaysia, patuhilah Perintah Kawalan Pergerakan. Pastikan juga diri dikuarantin selama 14 hari.

“Biarpun agak membebankan, namun langkah ini penting untuk menghentikan penularan Covid-19.

“Kerajaan dan Wisma Putra telah membantu saudara saudari untuk pulang. Jadi saya harap, saudara saudari juga boleh menjadi rakyat yang bertanggungjawab,” jelasnya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/kerajaan-tetap-berusaha-bawa-pulang-rakyat-malaysia-terkandas-di-luar-negara-hishammuddin-234727>